

थेसलोनिकीलावरालाई

पावलए छीनीकाव परींद ओरायो चिथी

पावलए ड़ादाडाव ओसरो चिथीलाव पाँर जाँ यामाबुभिधुवए थेसलोनिके मन्दलीलाव मिँर ख्रीस फरिकाव उहुन्या छचामए उजूनी 'आव सैं हो सैं' लिद जाँ याखर्लेसिज़्याव (२ थेसलोनिकी २:१-१२)। ख्वा ख्वाराए 'येसु हतप्त ज़ हुन्या ले' लिद भन यायेनर रास्द अइज़ यालिज़्याव (३:६-१५)। है जैद पावलए आव चिथील नो पाँर थःरैद ओरायो रैं:ज़्या। नल खिरीर पसिद दुख दैज़्यावरालाई यायुँर सभे:द ओरायो (१:४-१०), सोनो परमेस्वरए ओपाँत थःरिउ ओतारक लिद यायुँ हुबोरालाई ओरासम्जैव मनी रैं:ज़्या (२:१३-३:५)।

१ गे पावल, सिलास सोनो तिमोथीराए गेल्योनी थेसलोनिके सहरल लिज़्याव मन्दलीलाई गेबाबु परमेस्वर सोनो गेप्रभु येसु ख्रीसनी निमिननी आव चिथी परींद गया-चिज़्या। २परमेस्वर गेबाबु सोनो गेप्रभु येसु ख्रीसनी जेल्योदा नियुँ गरँद जेयुँ होलाँ जैद ओयाचिरक।

परमेस्वरए मिँरालाई न्यायस
याफाल्रिज़्याव

३गेनें गेमेँर, जे परमेस्वरए ओपाँत जेयुँ भन ज़ उहुपनाज़्याव, सोनो जे जेल मया दासिद भन ज़ जेखैना-ज़्यावए, गे जेजूनी परमेस्वरलाई एकतार धन्याबाद चरै:न्या ज़्यासो ज़

ताद ले। ४सोनो जे प्राईं खिरीर दुखर सहिद परमेस्वरए ओपाँत थ०रिद जेलिङ्यावए गे परमेस्वरए ओमन्दली-राए डाक जेजूनी 'आः चावर लिङ्यार' लिद प्राईंलाई ज्ञ है गेरादोज्या।

५नो जेदैङ्याव दुखराल परमेस्वरए ओन्याय चाव ज्ञ रैंःङ्या। परमेस्वरए ओराज्यालाव दुखर जेसहिङ्यावए, जे ओराज्या दैन्याकावर जेथ०रिङ्या। ६नो जेखिरी पसिङ्यावरालाई ते नो जेदैङ्याव दुखरानी परमेस्वरए ओन्यायनी ज्ञ जेखिस फेरैदचान्या ले। ७जे दुख दैङ्यावर ते गेस सिप ताद जेयुँ होलाँ तारिङ्या। हो बेलाक गेप्रभु येसु बनै यासक्ती ल्यो ओचाकज्यारास स्वर्गनी हुद वीं वीं चाँःङ्याव मेंःल सरैंःसिद, ८परमेस्वरस माखैवर सोनो गेप्रभु येसुए चाव ओथा माभैःङ्यावरालाई सजा याएरिङ्याव। ९नोर प्रभुए ओङ्गाकिन सोनो ओसक्तीलाव ओङ्गैकिन तँदा ताद खर्क ज्ञ मापुलुस्थुन्या सजाल परिरिङ्यार। १०हो छचाम फरी परमेस्वरए छैंव उमीराए याक्याँत ओल उमिन ब भन ज्ञ ज्ञगैव रैंःरिङ्या। सोनो ओललाई यायुँ हुप्पङ्यावराए याखार्ल उगुनर भन अचम्बलाव थ०रिङ्या। आव

गेरासथैङ्याव परमेस्वरए ओपाँत जे ब जेयुँ जेसुहुबोए नोराए याखार्ल जे ब जेतारिङ्या।

११है जैद परमेस्वरए जेलाई उखुल-चिउल उयुँलाव मितावर ओजैचिउक, सोनो परमेस्वरए ओपाँत जेयुँ हुप्प चाव येन दाव जेपैङ्याव भरिल ओल ओसक्तीनी ज्ञ सयो-द ओयाचिउक लिद जे जेजूनी परमेस्वरलाई एकतार ज्ञ गेपोंखारिङ्या। १२हो ताकिन ची गेप्रभु येसु खीसए उमिन जे जेल्योनी ब चाव रैंःरिङ्या, जे ब ओल उमिननी चाव जेरैंःरिङ्या। आव भरी गेपरमेस्वर सोनो गेप्रभु येसु खीसनी नियुँ ओगराँवनी ज्ञ ओताक।

परमेस्वरकिन तँदा

जैसिङ्याव

२ अ गेनैं गेमैर, गेप्रभु येसु खीस फरी उहुक गे ओलस दुप्सिद सिप गेतारिङ्यावए जूनी तोबो पाँ है गेदाचिङ्या। २ख्वा ख्वाराए, 'गेप्रभु येसु खीस उहुन्या छचाम ताधुके' है लिङ्यार। नितावराए गे गेमिन कुद इताव चिथीर यापरींकिन सोनो जेल्योक हुद, 'इताव पाँर परमेस्वरए उपुरूसनी ज्ञ गेदैके,' है यालिदी ब नोराए यापाँ पतिद जेयुँ

आंचा पांचा ताजैच्यो। ३सुवाराए ल्योनी ब ताभुकिच्यो। मानुवा भरी परमेस्वरकिन तँदा जैसिद परमेस्वरए ओकानुन माभैःज्याव नुल्या मिँ ओमासरैःसिवा पै नोकिन डादा गेप्रभु हुन्या माले। ४नो तँदा जैसिज्यावए मानुवाताव मिँराए यामानिज्याव देवताराकिन ओल ज़ सघ्योःसिद, परमेस्वरकिन ब स०द ध्यान फ़िमल चुसिद, ‘परमेस्वर डा ज़’ है लिन्या ले। ५जे जेमामेंःज्याखेहो, आव पाँ भरी जेस डालिज्याक है दाव ज़ डानैचिज्याव। ६नो मिँ ओसरैःसिन्या बेला ओमातावा पै नोलाई वेंद नैज्याव ‘आवए ज़’ लिन्या ब जेसैँज्या। ७खाली नो वेंज्यावए येम ओमारासा पै नो मिँ माहुधुइ। परमेस्वरकिन तँदाडाव येन ते आज्याल ब उजीँल उजीँल ताव ज़ लिज्या। ८येम ओरासोत वाज़ बल्ल नो परमेस्वरए ओकानुन माभैःद तँदा जैसिज्याव मिँरैःन्या ले। नोलाई गेप्रभु येसु ओज़गैस ओसरैःसिहुक उस० ह्वास ओजैव प्राइँना ज़ नो मिँ होक ज़ सिद उमिन ज़ मान्या ले। ९नो मिँए ओयेन भरी सैताननिकाव ओतावए सैतानए ओसक्ती रैद अचम्बलाव येनर चेतकर ब सतैँहरिज्याव।

१०नर्गलाव येमदा बाज्यावराए परमेस्वरए साचो ओपाँलाई माभैःद बाँचैन्या येमलाई यासोवए नो मिँए ओछलनी प्राइँ किसिमलाव धुतर पलेद याभुकैरिज्याव। ११है जैद परमेस्वरए मनी ‘निताव धुत पाँलाई ज़ घपतिज्यारक ते’ लिद मुन्दुक्यासो तान्या सराप ब याएरिज्याव। १२साचो पाँलाई यायुँ माहुपद मादान्या येनदा यायुँ थू जैज्याव भरी ननी ज़ परमेस्वरए ओसजाल परिन्या लेर।

परमेस्वरए ल्योदा बान्या छाँतिसिउर

१३अ प्रभुए उयुँलाव मिताव गेनै गेमेँर, जेजूनी गे एकतार परमेस्वरलाई धन्याबाद चरैःव परिज्या, काराव ल्यो ताकिन परमेस्वरए साचो ओपाँत जेयुँ जेसुहुपुज्याव सोनो छैँव पुरुसए जेलाई छैँवर ओजैचिउनी जेलाई डादाकिन ज़ अजम्बरी जुनी ओलस ज़ दैन्या छाँतिद नैचिउ। १४हो येमल बान्याए जूनी ज़ गे गेसथैचिज्याव चाव थानी परमेस्वरए जेलाई खुल्द नैचिउ। ननी ज़ गेप्रभु येसु ख्रीसए ओज़गै जे ब जेदैरिज्या। १५है जैद गेनैँ गेमेँर, जे गेल्योनी जेपैसिउ भरी, गेयाःनी तादी ब, सर्सिउ चिथीनी

तादी ब जात्त ज़ मारास्द नत ज़ थ०रिद लिच्यो।

१६-१७ गेप्रभु येसु ख्रीस सोनो गेबाबु परमेस्वरए जेलाई चाव जेयेन, चाव जेपाँ भरिल जेयुँर होलाँ जैदयाद थ०रिउ युँ ब जैद ओयाचिउक। गेबाबुए गेल्योदा उयुँ थू जैद उयुँ ओगराँवनी ज़ गेलाई अजम्बरी जुनीए आस याद गेयुँ सभैःदयासिक्यो।

गेजूनी पोंखारिदयासिच्यो

३ अ गेनै गेमैर, फरी ब गेपाँ तोबो लिज़्या, गेजूनी पोंखारिदयासिच्यो। जेयुँ हुपद जेयुँल जेरैव मिताव, प्रभुए ओपाँ प्राइँदा चाँदो ज़ घराःसिक, उमिन ब प्राइँदा गघ्योःनाक। २ परमेस्वरकिन तँदा-डावर सोनो ओपाँ सोज़्यावराए ल्योनी पाथस पुलुसो गेदैक। परमेस्वरए ओपाँत यायुँ माहुबोर कुधु ज़ लिज़्यार। ३ हितावत ब प्रभु युँ हुबो ज़ लिज़्या। है जैद जेलाई मनी प्राइँत ज़ थ०रिउ जैद माचाव भरिरानी जोगोइद पाथस नैचिरिज़्याव। ४ है गेदाचिज़्याव भरी मारास्द दाव ज़ जेनैज़्याखेहो' लिद जेजूनी गेप्रभुए ल्योदा गेयुँर हुबो ज़ लिज़्या। ५ परमेस्वरए जेयुँ ओल्योदा भन ज़ जैद ओयाचिउक, सोनो ख्रीस उथ०रिउ मिताव जेलाई ब थ०रिउ ओजैचिउक।

चाव येनत जेसाँ तासैःच्यो

६ अ गेनै गेमैर, जेलाई गेप्रभु येसु ख्रीसए उमिननी गेअर्थैचिज़्या, आव गेपैचिज़्याव पाँर मातीज़्याव अल्सी जेनैरानी जोगोइसिद अछतड लिच्यो। ७ बुरू गे जेल्योड गेलिकाव गेदोव मिताव येन जे ब दोचिके। जे ज़ जेसैँज़्या, गे जेस गेलिज़्याक येन दान्या अल्सैँ गेमादोए। ८ सुए ल्योनी ब अइज़ गेमाज़्युए। बुरू सुलाई ज़ प्रैरैव तापरिक लिद बनै दुखस लाकनी रील येन दाद गेजिउ गेडाके। ९ गेलाई चाहिज़्याव भरी जेल्योनी दैन्या हक ओमाल्योए ते माःक। खाली गे स्यासो घदोरक लिद गेदोव येन भरी जेड़ाक सतैँद गयाचिके। १० जेस गेलिज़्याक ब, 'जोए येन मादोव, होए ज़्यान्या ब ताज़्युवक,' है दाव ज़ गेनैचिज़्याव। ११ हितावत ब जेनी रूवा रूवाराए येनत यामी सैःद अइज़ चुसिद यानैरालाई यारा-तोबोलैज़्यार दी लिन्या गेथैँज़्या। १२ निताव मिँरालाई गेप्रभु येसु ख्रीसनी गेराअर्थैँज़्या, यायेन सुरू सुरू दाद याभूँदी याज़ ओडारक। १३ जे भन्या गेनै गेमैर, चाव येन दान्यात जेसाँ तासैःच्यो। १४ सुवाराए आव गेपरीँज़्याव चिथीलाव पाँर यामाभैःकिन जे नो मिँलाई सरेस्द

ओयेनए ओल ज़ लाज मोर्नो घताक
लिद ओलस खदेप तालिच्यो।
१५ खाली नोलाई सुतुर स्यासो जैन्या
ते माःक, बुरू क्याँए भाइ स्यासो जैद
नोलाई सिडारो ताके।

तुपैन्या पाँर

१६ अब प्राइँ युँ होलाँ जैज़्याव
गेप्रभुए जेलाई प्राइँनी प्राइँनी एकम्या

जेयुँ होलाँ जैद ओयाचिउक। सोनो
परमेस्वरए जेस ज़ बास ओदोवक।

१७ डा पावलए डाचिथी भरित
डासही छाप डाभाःज़्याव मिताव
आव चिथीत ब डासही छाप भाःद
डानै। ननी ज़ ‘ओल ज़ उपरींव
ओल्यो’ लिन्या सैन्या जेले।

१८ जेल्योदा गेप्रभु येसु ख्रीसए उयुँ
ओगराँक।